



www.HonggaMona.com

Siñot Ed Benavente

*Interview conducted by Miget Lujan Bevacqua, Ph.D., and Kenneth Gofigan Kuper, M.A., 2015.
Video recording produced by Leonard Leon.*

Video interview @ <http://honggamona.com/video/sinot-ed-benavente>

Ed: I na'ân-hi si Eddie Leon Guerrero Benavente. I Leon Guerrero, familial Lale', i Benavente familial Cheddo'. Mafañagu yu' gi diha kuattro Agosto, mit nueve sientos singkuentai sais na sâkkan.

Miget: Now, gof ma tungo' hao nai giya Guâhan, komu activist. Kao siña un sangâni ham put taimanu na mababa nai i hinasso-mu put este na asunto siha?

Ed: Okay, nga'ian na hu tututuhon yu' gi activist nu siña buente ta kâsa todudu tâtte gi ochenta na sâkkan annai umeskuekuela yu' komo undergrad gi unibetsidât Guâhan. Hu chuchule' si Dr. Underwood guihi na tiempo nu komu History of Guam no ma'estro-ku yan kalan guiya magâhet nu gumigiha ham guihi komu manestudiante ni manhoben na Chamoru guihi na tiempo. Ya un diha nu ha po'lo si Dr. Underwood nu dokumento, tinige' unu na profesot giya University of South Pacific si Dr. Albert Wendt, tinige'-ña ayu mafa'nana'an "Reborn to Belong." Ya magâhet hu chule' ayu na tinige' ya hu taitai. Gi sigiente diha, kalan mababa i matâ-hu. Ya desde ayu para mo'na magâhet, kada hâfa hu cho'gue mobimenton lina'lâ'-hu, puru para i lina'la' Chamoru. Sumaonao yu' gi, gi unibetsidât gi ayu mafa'nana'an "Chamorro Club Organization" yan kâda nu charter day, manna'hâlom ham, manmangagahat nu put i hemplo nu sade'gâni para ta fatta i guinaha-ta komo manChamoru guihi na tiempo. Pues, hunggan, ayugue bumaba yu'. Pues desde ayu lokkue' mo'na kâda hâfa hu cho'gue achokka' i hâfa hu pâyuni siha na klâsen che'cho'-hu taiguihi danderu no ântes, guihi na tiempo rock and roll no. Pues, annai makmâta yu', kalan hu tulaika pues hu tattittiyi siha na grupu taiguihi as Charfauros Brothers ya hami mandândân yan si Ike Charfauros guihi na tiempo. Pues, esta hu ripâra na kontodu i dandan na gi kotturâ-ta, hu tâtittiyi ya hu kekeabiba kosaki ta fanlâ'la' lokkue' gi musiku na manera no. Pues, hu tâttiya si Charfauros Brothers guihi na tiempo, sumaonao yu' gi album Flora Baza Quan, guihi na tiempo gi annai humuyong ayu i plâkan "Hâgu." Gaige yu' guihi na gumitatâlla nai guihi na plâka. Pues, ayugue siha na saosaonao yu' pues hulo' esta gi ochentai nuebi na sâkkan annai estâba yu' gi KUAM umbe sa' guihi na tiempo, ma, ma'empleao yu' gi Calvo's Enterprises gi KUAM komu a DJ guihi na tiempo. Pues, gi station Chamoru no, pues humami yan taotao Tinian si Ed Dela Cruz guihi na tiempo ya si Ed Dela Cruz humami, dumos kâyu sa' Ed na'ân-ña ya este kâyu na palâbra kumekilek-ña dos parehu na'ân-ñiha nai. Pues, kâyu na'ân-mâmi, dos kâyu si Ed Dela Cruz yan guâhu. Ya



www.HonggaMona.com

desde ayu magâhet no mana'sâga yu' mâs la'apmam gi KUAM pues humuyongña, guâhu ha' nu gumo'te timon gi komu DJ para i estasion Chamoru kåda ogg'an. Pues, guihi na biâhi dos hu manenea. Fuera di estasion Chamoru gi 610, ma faisen yu' ni KUAM kao siña hu produci i prugrâmma kombetsâsion. Ya guihi na tiempo, si Jesus Chamorro difunto si Jesus Chamorro no, guihi na tiempo nu ma'âgang kao siña nu guiya para talk show host. Pues matâ'chong ham manmiteng and i general manager guihi na tiempo si John Denight, ya ilek-ña, "Ed yan Sus, necessita ta na'guaha kombetsâsion Chamoru put asunton Chamoru. Pues, magâhet, kana' mâs ki singko âños di lumâ'la' ayu na prugrâmma, i prugrâmma kombetsâsion. Ya manhungok yu' komu estudiante ginen as difunto Sus Chamorro lokkue' put palâbran Chamoru no. Guaha na kuririhi yu' gi anggen kumuentos yu' sa' hoben yu' kontra si difunton Jesus ya hu respeta ayu na taotao. Menhâlom na taotao gi fino'-ta ya pat masâsângan fino' hâya. Ya desde ayu magâhet, nu hulo' esta mina'singko âños annai hu dingi KUAM. Antes di bei dingi gi ochentai nuebi na sâkkan, umali'e' ham for the first time yan unu na che'lu-ta ni ha dingi hit pâ'go no. Pâ'go chagi uma'li'e' yan si Ânghet Santos. Si Ânghet Santos guihi na tiempo, guiya lokkue' guaha sumângan, muñangon gui' ya ilek-ña, "maolekña na un kuentusi este as Ed Benavente." Pues, guâhu lokkue' kada hâyi umali'e' ham yan i kalan taiguihi i inakammo' pat baotismo guaha fihu guaha humânao guâtu giya guâhu ya ha ñangon yu', "Guaha na kumuentos hamyo yan si Ânghet Santos?" Pues, tâya' na umali'e' ham magâhet and si Ânghet Santos. Pues, un diha, nu hu oppe' i tilifon gi gima' pues magâhet si Ânghet Santos gaige gi tilifon. Pâ'go humuyong ginen i Air Force si Ânghet guihi na tiempo. Ilek-ña, "Hey me'lu, kao siña ham na dos kumuentos?" Ilek-hu, "Un tungo' hâfa che'lu? Mamaila' gi gima' ya ta fatâ'chong pâpa' sa' esta bula taotao fumamaisen yu', kao guaha na kumuentos hit na dos." Pues, desde ayu magâhet, mâtto si Ânghet guâtu gi gimâ'-hu. Guihi na tiempo ya matâ'chong ham na dos, tumulanoche ham na dos magâhet kumuentos put todû asunto ni inafefekta i taotao-ta. Magâhet na bonitu i dinanña' guihi na puengi. Desde ayu magâhet, humami and si Ânghet mo'na todudu desde este grupon "Che'lu" hulo' esta i Nasion Chamoru pues humahânao esta annai ha dingi hit, i finatai-ña si Ânghet nu magâhet gos hihot ham na dos. Ya maseha mânu ham guâtu, fihu ilek-ña, "Hey, hâgu mas hihot gi as Ânghet, hâfa siña un sangâni hit put si Ânghet difunto?" Gi hâfa i hinassosso-ña, hâfa kinalâmten-ña, ya fihu hu estoriâyi siha put ayu. Lao, guihi gi fine'nana na umasodda' ham an si Ânghet, guihi na tiempo, esta in fotma na, "maila' ya ta kombida i pumalu siha ni manmababa atadok-ñiha ni todû achaki-ta ni manChamoru ya maila' fan ya ta fanhunta." Pues, magâhet nai gi gimâ'-hu ha' i fine'nana na hunta para i ta sângan matâ'pangi "Nasion Chamoru" gi Nobenta, mit nuebi sientos nobenta na sâkkan guâtu gi gimâ'-hu. Mandanña' magâhet todudu guihi siña ha' buente pasalista i, si senator Hope Cristobal, si Ron Teehan, puru este siha O.P.I.R.,



www.HonggaMona.com

Organization for People's Indigenous Rights na grupu. Ron Teehan, si Tan Ritan, at that time si Tan Ritan Franquez, puru siha manhagas annai hu a'atan hulo' siha manactivists gi 70's. Pues, manmåtto todudu siha, si Dr. Dungca, si, wow labula guihi siha ni manactivists ni hu respeta. Pues, siha lokkue' nai kalan manmalago' ma li'e' i manlahoben guihi na tiempo, hami, guáhu yan si Ánghet yan i pumalu. Pues, manhuyong si guihi na tiempo si Al Lizama, si William Hernandez, si háyi tata'lo otro siha, labula yan ayu i manhagas hu respeta siha na taotaogues ni ma tachuchuyi i kotturá-ta yan i lengguáhi-ta, manhuyong guihi na puengi. Ya bumonitu i huntan-mámi guihi sa' i guaha siha resolution nu in kumple na magáhet debi di ta prutehi i tano'-ta, i lengguáhi-ta, i kotturá-ta, todú i payon-ta, i primet lugát, i tano'-ta no. Pues, desde ayu magáhet ma in ta'pángi i "Nasion Chamoru." Ya desde ayu magáhet, manmanhula i todú i manmembro guihi na desde pá'go para mo'na guihi na tiempo, maseha háfa nu ta cho'gue, ta cho'gue komu inetnon este "Nasion Chamoru" ya ta cho'gue put guinaiya-ta ni lengguáhi-ta todú ayu hu menta ni pasalista komu para u nina'lá'la' un rásan taotao gi enteru mundo. Ayugue magáhet tumutuhon ya desde ayu i nobenta, nobentai unu, nobentai dos, káda rátu i un li'e' ha' i Nasion Chamoru manma, manmanews gi either PDN guihi na tiempo, i Tribune, Guam Tribune i na'án-ña. Todú kana' káda mes guaha coverage nai magáhet gi media. Ya magáhet i che'lu-ta as Ánghet, guiya gi gumogo'te timon sa' guiya i spokesman ni Nasion. Ya desde ayu magáhet si Ánghet, esta kalan ha tungo' lumassa i todudu i asunto-ta kontra i media ni dipotsi kalan ti chumilong yan i filosofia ni Nasion no. Pues, desde ayu ha' tungo, ayu na fihu ma sángan na nu kao umeskuela si Ánghet gi este mediabyte. Ilek-hu, "áhe' ti umeskuela, ha payuni ha' esta sa' naturát para guiya manhasso." Un maláte' na boi magáhet ya ayugue muna' hu gos respeta. Hoben guihi na tiempo, guaha singko años umadingu ham magáhet or tres años umadingu ham yan si Ánghet lao menhádomña ki guáhu para háfa di ta puni. Menhádom na boi, desde mafañágu fa'na'an nu esta ha' ma tungo' na este na boi naturát na boi na para u intilente. Manhasso yan menhádom i **????** **(10:33)** anggen para en mári na dos ayu para en debate na dos hu garante na tinelleng hao gi pá'go ha' i fine'nena na kuestion ni un dággao gui'. Esta ha tungo' háfa para i ineppe'-ña guaha tátte giya hágu. In fact, ha tungo' si Ánghet mumári gi taiguini na manera, esta ha tungo' háfa para un dággao na kuestion gi mina'sigundo biáhi. Pues esta antisisipa háfa para i kuestion-mu ta'lo. Pues, ayugue na hu tungo' na fuera di maláte' este na taotao, esta kalan ha tungo'. Umatan hao, inatan-ña giya hágu esta ha tungo' na kao sinseru pat kado' kado' hao na taotao. Siña as si Ánghet ha taitai enao gi taotao. Pues, ayugue muna' hu respeta magáhet si Ánghet sa' siña ha atan i taotao ya ilek-ña pá'go giya guáhu, "me'lu." Ilek-hu, "me'lu háfa?" Ilek-ña, "kalan ti mannge', kalan ti kombienú guini na lugát. Ilek-hu "Sa' háfa?" Ilek-ña, "Kalan kado' kado' i taotao guini ni ta kuentutusi, maolekña ta hánao, potno u guaha atborutu no. Pues, esta ha tungo'



www.HonggaMona.com

ha' si Anghet ayu para hâfa di u fatâ'chong pâpa' ayu ha tungo' ha' kao maolek i dinanña' no pat ayu kado' kado'. Komu ha tungo' na kado' kado' pues kalan un gagâsta i tiempo-ku para bei kuentusi hao put i lina'lâ'-ta komo Chamoru. Pues enague magâhet tumutuhon todus i Nasion Chamoru.

Hunggan, guini gi ineppe' komunidâ kontra i Nasion Chamoru, hunggan magâhet, para hâfa di ta puni. Klâru yan a'gang na siña ta sângan ochenta gi tinituhon ochenta pat sientu kumontra ham sa' todus i hinenggen-mâmi ni para u nina'lâ'la' i Chamoru kinentradidisi i hagas hinenggen-ñiha or hagas manmafa'nâ'gue'-ñiha i taotao-ta. Pues, hunggan nai magâhet, ai naturât na makkat ayu para un châppak i taotao gi hâfa dipotsi mafa'nâ'gue'-ña desde i dinikeke'-ña no. Nu fino' si Anghet i fihu ha' ha usa na ihemplo, ilek-ña pâ'go, "me'lu, makkat ayu para ta sangâni i patgon na ayu commercial role aids, how do you spell relief?" Ayugue, fihu ha hasso si Anghet. Ilek-ña, "Pues, maolekña ta libre hit guini ya ta hânao sa' kalan ti toto'a este siha na taotaogue siha. Po'lo ya bei kuentusi gi un manera ya annai kombieni para siha ya kombieni para guâhu. Pues magâhet, gi tinituhon-ña ochenta pat sientu lao siña hu sângan na annai, ântes di u dinguh hit si Anghet guini gi hilo' tâno' tumunok, I mean, kumahulo' guâtu gi singkuenta pat sientu. Manmanhongge fiet na maolek bidâ-ña, maolek bidâ-ña si Anghet komu guiya gumo'te timon gi Nasion Chamoru yan dos, maolek bidan-ñiha i Nasion Chamoru. Ya magâhet, ayugue na hinasso yan che'cho'-ña si Anghet nu munâ'i mâs ânimu i pumalu ni manetehnan, para u kontinua i che'cho' Anghet hulo' esta i prisente. Ayu na gof magof yu', kâda hu li'e' i otro na henerasion, i kinahulo' i otro na henerasion. Gi tetehnân-mâmi, kâda in li'e' na mangahulo' pâ'go gi hâfa na kinalâmten piot guini gi militarization no na asunto ya ilek-ñiha, "no ti todus maolek yanggen humâlom este na asunto, maila' ya bei sangâni hao hâfa siña bâba para hita no". Sa' ti todus maolek umbe hunggan magâhet ayu na kuentos. Pues, hunggan klâru na guihi na tiempo kalan guaha tituka' gi media ya in ripâra no. Ya ayu na magâhet maneskuela ham no put tumaimanu dumâggao hâlom ni guaha na treintai sigundo ha' manâ'i ham ni media. Kâda mafaisen yu' kuestion. "Siñot Benavente, Why are you here? What's the purpose of your protest?" Pues, ayugue na esta magâhet i tiningo'-mâmi yan si Anghet, esta in tingo' ha' tumaimanu pumo'lo gi ayu mafa'nana'an "nutshell" i hâfa para bai in na'klâru huyong gi publiku. Pues, an humâlom yu' ya bai interview yu' pâ'go ni let's say PDN pat, esta hu tungo' ha' na ti yan-ñiha este ayu prolonged response sa' tâya' ma espipiha ni este na media "sensation", "sensationalization of an issue." Pues, magâhet ayugue in tingo' chumo'gue magâhet. In tingo' mulassa tumaimanu para bai in na'siguru nai i mensâhi put este na asunto, mâtto guâtu gi linahyan para i taotao ni ume'ekungok pat ume'egga' television gi an mane'egga' news no yan manmakubre ham ni Nasion Chamoru. Pues, maolek si Anghet gi taiguihi na manera nai, manoppe' gi me'nan



www.HonggaMona.com

i media. Ya in ripâra magâhet na desde ayu, adumidide' guaha siha taotao manhuhuyong maseha mânu ham guâtu pâ'go, ilek-ñiha, "maolek bidân-mimiyu boi, kontinua." Pues, ayugue munânâ'i ham ânimu kâda in li'e' pâ'go manhobensitu pat manâmko' no ilek-ñiha, "Kontinua hâfa en cheche'gue boi." Hunggan, guaha dinida ginen i mismo mañe'lu-ta sa' gi entre todû i lina'lâ'-ta, todû i tiempo ti parehu i filosofia no yan i hinengge-ta yan i taotao-ta. Kada individuat, individuat hinasso-ña. Ya yanggen mapoksai hao yan nu kumahulo' hao gi militât na fina'nâ'gue', siempre magâhet un supoti todû guaha put militât lao komu sabit na mapoksai hao hulo' ya dumângkolo' hao hulo' gi sabit na manera, pues siempre un aksepta na guaha siempre duda gi hâfa na sistamento ma dadâggao huyong ginen i otro bânda no. Pues, guihi na in tanteteha kao maolek este para i taotao-ta pat bâba. Pues ayu na meggaiña na biâhi ya yanggen in tanteha na kalan para ti, kalan bâba este para mana'hâlom taiguini siha na âtmas guini gi military buildup. Ya nu ti chumilong yan i tano'-ta yan mânu este siha na klâsen âtmas na para u fanmahâfot. Kao para u tâtme pat para u na'binenu no i tano'-ta? Todû enao siha na kuestions, maloloffan gi ilon i activists or i titanos i activists yanggen ha tanteteha kao para u suppoti pat kao para u kontra. Pues, todû este siha nu dipotsi gaige gi hinasso-ña.

Ya hunggan, sin duda, na gi tinituhon guaha tituka' gi manmakseptân-mâmi yan ayu kao para in matoktok ni publiku pat âhe'. I ideha ginen todû lao i tumuge' si Ânghet, para hâfa di ta puni, âhe' solo guaha otro gi mangga'chong-hu, ai ilek-ñiha "Oh Ed hâfa na ti ha nâ'i kreditu. Lao, gi minagâhet, hu tungo' si Ânghet ya umbe i familiâ-ña, fihu ilek-ña, "Ed hâgu mas hihot gi as Ânghet. Hâfa nu para u cho'gue guihi na manera komu este na asunto ma nu fumâna' gui', hâfa mohon u cho'gue si Ânghet." Enao hu tungo' put si Ânghet mâs ki mismo i manhihot giya guiya no. Pues, hu tungo' na guiya tumuge' i ideha todû ginen i huntân-mâmi no ni Nasion lao guiya matâ'chong yan guiya tumype guihi na tiempo sa' si Ânghet magâhet tekngo' gi technology guihi na tiempo esta sa' umbe na boi desde ântes di u hâlom gi militât, esta ma tungo' ha' na intelente na boi umbres i umeskuelâ-ña, puru ha' awards si Ânghet, puru ha' "A" i gradu-ña gi todudu asunto. Pues esta un tungo' ha' na boi na para u menhâlom este na boi. Pues, sin duda na guiya tumuge' i todû ideha ya na'unu ha' hulo'. Pues, guihi na tiempo gi nobentai unu na sâkkan, humuyong yan taitai gi me'nan todû i media.

Guihi na ha'âne', esta ha' in planuyi gi timon annai si Ânghet gumogo'te i timon guihi na tiempo na in planuyi na para bai in famprotest gi, gi unu na liberation parade. Pues an munhâyan ham guihi gi para bei in fanatattiyi pâpa' gi latte park, guihi na tiempo latte park, na'ân-ña nai. Pues, annai munhâyan ham nu giya, sa' ayu na parade masusedi giya Tomhom, âhe' ti iya Hagâtña sa' ma fa'mamaolek i chalan giya Hagâtña. Pues an manmunhâyan ham guihi ayu na



www.HonggaMona.com

manasodda' ham gi latte park guihi na tiempo sa' gos ya-ña si Anghet guihi na lugât. Some, guaha, ni kâda, guaha individuât giya hita, guaha ayu mafa'nana'an "spiritual connection" ya hagas ha' si Anghet i anten i ayu na latte, hihot para guiya. Fihu ha sangâni yu' giya guâhu, ilek-ña, "Un tungo' hâfa me'lu? Kâda lai mâtto guâtu giya, gi latte, guaha na matâ'chong ha' yu' guihi ya hu tanteteha todû i achaki-ta ni manChamoru ya kalan mannge' i siniente. Ha tungo' i sinienten i ante guihi na lugât ya kalan ma akseptâ gui' guihi na lugât magâhet giya Hagâtña. Lao in fin, guihi na ha'âni magâhet, annai manasodda' ham, u manmâtto todû i media ta'lo ma tâttihi ham ginen i protest gi para i liberation parade gi egg'an. Ya guihi na ha'âne' magâhet, ha taitai si Anghet ayu proclamation no so to speak ya i proclamation kalan nu i mafa'nana'an i birthright i taotao-ta yan i direcho-ta komo para ta fanlâ'la' gi hilo' tâno' kontra i kumoloninisa hit komo estados unidos. Pues, hunggan klâru na unu, guiya tumuge', dos, esta ha planuyi si Anghet nai ayugue para u sângan i proklama gi enteret iya isla yan kontudu i enteru mundo epesiatmente estados unidos na guaha problemâ-ta guini gi kinalâmten-ta gi lina'lâ'-ta entre i estados unidos yan i Chamoru.

Bei sângan gi taiguihi na manera i hâfa kao guaha nu dibision gi entre otganasion ya guihi dos mâs metgot na otganasion na Nasion Chamou yan i O.P.I.R. Tâya' na poddong i respeton-mâmi kontra i O.P.I.R. sa' i O.P.I.R. tumutuhon tâtte gi sitenta na sâkkan. Hami kalan ayu i let's say siña nu, "new kid on the block." Pues, i "new kid on the block" necessita lokkue' u fanmafa'nâ'gue' no. Pues todû i tiempo, gi minagâhet este, nu tâya' na in ñiega i filosofian-ñiha i O.P.I.R. Ayu na todû i tiempo mana'afa'maolek ham esta pâ'go. Tâya' na guaha ayu na para bei in fatâni siha, tâya' na in disatendi hâfa dipotsi O.P.I.R. hineggen-ñiha para hâfa guaha guihi. In fact, komu un atan todû i che'cho' i Nasion, tâya' otro bidân-mâmi nai in chule' ha' ta'lo hâfa hineggen-ñiha i O.P.I.R. ya in chile' ya manhâlom hulo' guihi na escalator no or gua'ot. Ya in che'gue lokkue' hâfa i che'cho'-ñiha. Put i hemplo, tâya' guihi na tiempo gi todû i che'cho'-mâmi na in bisita i nasiones unidos no i United Nations. Lao guihi na tiempo, esta duru ham man'eyak bumisita i nasiones unidos, para, para ta plânta, para ta apella hit kontra i nasion siha gi enteru mundo para u ma hungok todû i achaki-ta komo manmakoloninisa hit ni mâs metgot na fuetsân sisteman gobietno gi enteru mundo. Pues magâhet guaha manhinengang komu humâlom yu' gi United Nations ya hu sângan put i estoriâ-ta, guaha na mambinaba u manyinaba i atension-ñiha todû i nasion. "Ai agon, taimanu no na masusedi gi dipotsi demokrasiâ na nasion." Pues kalan guaha ayu mafa'nana'an "kontradiksion" no entre i filosofian demokrasiâ, life, liberty, and pursuit of happiness. Ya todû este siha precepts of democracy kontra ni hâfa i hinegge-ta komu Chamoru no. Pues, annai ma li'e' yu' ni O.P.I.R. ayu na ilek-ñiha i O.P.I.R., un tungo' hâfa,



www.HonggaMona.com

“maolek lokkkue’ esta chalan-ñiñiha i Nasion sa’ fuera di internal ayu mafa’nana’an i achaki-ta guini komu i land trust act, i federal excess properties, i Chamoru language mandate hulo’ asta high school i toxic and chemical waste sites ni un kontra tåtte gi nobenta annai i federåt para u na’hålom båtko, toxic soil guihi na tiempo gi nobenta. Ayugue na ma li’e’ na ma tulalaika i nasion annai esta dururu in bisita i nasiones unidos. Pues, ginen ayu si Hope Cristobal, si Ron Teehan, ayugue na ilek-ñiha, “Wow, esta pã’go este siha na grupu manwell-rounded.” Esta di kãda sãkkan, guaha murepresenta i Nasion Chamoru ya manhãnao ya mainapella todú i asunto-ta komu manChamoru gi nasiones unidos.

I strategy parehu ha’ yan i fino’ si Ånghet i hagas strategy ni ha usa put si Mahatma Gandhi. I stategy ni ha usa si Ånghet sa’ si Ånghet ha taitai todú este siha. Ha taitai si Mahatma Gandhi, i struggle-ñiha, si Mandela, Martin Luther King, todú este siha na lepblo ha taitai si Ånghet. Tåtte yan mo’na ya kãda munhãyan ayu i lepblo-ña, ha nã’i yu’ pã’go, ilek-ña “me’lu taitai este ginen as Mahatma Gandhi. Taitai este ginen as Mandela.” Todú ayu siha magãhet. Pues, magãhet parehu ham na dos, ineducan maisan ham nai nu put i todú i achaken i mañe’lu-ta siha gi otro na nasion siha. Pues, ginen ayu magãhet, numã’i ham didide’ bãla para manhasso gi taiguenao na manera. Pues, i stategy ni siña ta sãngan stategy komu ayu “nonviolent na strategy.” However, ayu mafa’nana’an lao guaha na biãhi na anggen måtto hit guihi ayu i mobimentu no. Ayu pruklalãma si Mahatma Gandhi komo non-violent no, guaha na macho’cho’, mama’che’cho’ gi guaha na nasion lao bei konfesåt ha’ pã’go. Guini gi nasiones Chamoru nai, umbe sa’ i kustumbre-ta komu Chamoru komo muna’bubu hao no kumahulo’ hao. Gaige dipotsi nai ingrained gi hagã’-ta na anggen guaha nu mambuskaplaito kontra hãgu, ilek-mu pã’go “ai ki **???? (26:17)** sa’ manoppe’ giya guãhu. Un li’e’ ayu? Pues, guaha na i stategy ni in isa nai para bei echa manmanhongge ham nu este i filosofian Mahatma Gandhi, “to provoke a response.” And that’s the only way, the purpose of any protest is to provoke a response. Pues, magãhet nai we provoke a response gi manera ni in galoppe i kellat giya Tiyan. Lao ilek-ña i, ilek-ña i Chamoru, anggen un handcuff hit ya un chu’ot hit, siempre nai chini’ut i Chamoru ya manembeste tåtte. Pues ayu na bula na Chamoru annai ma li’e’ si Ånghet nai ya ilek-ñiha guãtu gi marine, ha tola’i, sa’ chinchiot, bula na Chamoru ti ma li’e’ na chinichi’ot sa’ ha na’maffnot i handcuff ya ha hãlla hulo’ i handcuff gi tåtten kannain i che’lu-ta as difunto ya chini’ut nai. Pues, hãfa hao nai ni chini’ut ni achokka’ ga’lãgu ni galagitu ni mãnsó ya un chonnek guãtu gi rikon ya mãnsó na gã’ga’, komu un sigi ha’ dekkã’ i ga’ga’ yan un uyu, humuyong dumaddao i ga’ga’, i galagitu ni mãnsó. Hu guarantee hao u cho’gue ha’. Sigi ha’ gumalute’ i ga’lãgu ni mãnsó, ya fanhongge chaddek na manãkka’ tåtte, ilek-ña. Hu guarantee hao. Pues,



www.HonggaMona.com

magâhet, ni nungka ni achokka' mantaotao hit umbe ya i taotao, i taotao, Si Yu'os, Yu'os. Pues todû ha' komu chini'ut hao ya sigi ha' chini'ut hao achokka' ilek-mu "hey, mampos este" nu ya ha na'hânao hulo' ya sigi ha' ilek-ña i taotao ni umaresta hao, "mamatkilu ha'" ya sigi ha' ha cho'gue hâfa ha' chogue, siempre manoppe' taotao tâtte ya tâya' siña taimanu para u fanoppe' sa' ma handcuff ya siempre ha tola'i i taotao. Pues, guaha na manhinengang ni Chamoru yan ayu, lao gi minagâhet mañaina-hu yan mañe'lu-hu, komo gaige hao guihi sa' humami yan si Ânghet ma'aresta ya madâggao ham na dos gi tribunât, fanhongge yu' chaddek na un li'e' mabidâ-ña pues maseha hâyi achokka' tomtom na gâ'ga' komu pat mânso, komu sigi ha' un **pacha (28:18)** i ga'ga', hu guarantee na inakka' hao tâtte. Pues, hunggan, guihi na mumentos na sigundu, ni achokka' hâfa na strategy in isa todû i tiempo guaha achâki achokka' stratagen nonviolent. Guaha na humuyong ti man nonviolent siempre guaha didide' scuffle, ayu mafa'nana'an, ilek-ña, "there was a Tiyán scuffle" or annai manestâba ham guihi hulo' gi route 3A para bei in tupa pâpa' i sentry guard ya manma'aresta ham ta'lo guihi, ilek-ña ta'lo, "Ti nonviolente este na violent sa' matupa i shield. Ilek-hu, "No, taimanu na para un sângan nai in tupa i shield annai tâya' bidân-mâmâmi na manmamommokat ha' hâlom. Dispensa' hao na 300-pound i taotao ni tumotpe i shield ni gumogo'te i militât. Lao ti isao-ña no, nonviolent barigona malago'-ña ya malago' para u hânao gi tano'-ña. Pues, bula guihi na tiempo anggen un hâfa i strageden i Nasion, guaha na in planuyi kon tiempo lao guaha nai gi mobimenton i aksion, guaha na manmaleffa hit ya dipotsi naturât ha' no. Ni achokka' si Yu'os annai estâba guini gi hilo' tâno', ti todû gumuaiya si Yu'os annai mamommokat gi hilo' i tano'. Eno klâru, taitai gi biblia. Tâya', ti todû, ilek-hu na komu guaha guihi na tiempo nu kumukukula kuânto gumuaiya si Jesu Kristo, annai duru kumuentos put i lina'la' i biblia, i anggen mâtai hao, siempre ilek-ña na ti todû gumuiaya gui'. Ayu na ma klâba gi kilu'os, i yu'os-ta. Pues, anggen guiya ni Yu'os, siña maklâba gi kilu'os kuatstaria hita no ni taotao, makkat para ta na' really, literally, nonviolent.

Guihi na tiempo, dos in ripâra pätte no gi dipotsi i mision-mâmi komu Nasion Chamoru put para bai in atan kao dipotsi bâba i che'cho'-ñiñiha i militât guihi na tiempo pat maolek. Guihi na tiempo, duru manmafa'nana'an "manengage" i militât guihi na tiempo ni ayu mafa'nana'an "low flight." Ya kâda ha'âni, kâda ogga'an, manunok i F-15 or F-14 guihi na tiempo, maleffa hâfa ayu na klâsen batkon aire ya manunok pâpa' buente siña ta sângan lâmita karera komu para un miya ya a'gang ya bula maninestototba guaha komo gaige hao Tomhom, gaige ha' gi hilo' hotel todû, ya guaha manmatâ'chong ham, manmiteng ham yan si Ânghet, ilek-ña, ya guihi na tiempo esta in planunuyi mamprotest ta'lo gi iya Tiyán sa' in kalamtitini nai para u ma na'na'lo i tano' tâtte no. Pues guihi na ha'âni, humâlom si Ânghet ya ilek-ña, "me'lu, mañe'lu-hu,



www.HonggaMona.com

nangga sa' duru ta'lo i lowflight training ni militât gi iya Tiyan yan Tomhom. "Hâfa siña tâ cho'gue nu ayu.", Ilek-hu. Pues ilek-ñiha i pumalu, "Maila' ya ta package ha' two issues in one no ya ta chule' este na asunto guâtu giya Tiyan. Unu i para u ma na'na'lo tâtte Tiyan giya hita yan dos u ma na'pâra i low training exercises guini gi diposti komunidâ. Ya maila' ya bai nâ'i sustansiâ-ña sa' hâfa? Giya estados unidos, ti hu sodda' enao no para u guaha low training airflights giya L.A umbe. Ni mânu un fañodda' enao. Ti un sodda' enao gi maseha mânu na siudâ giya estados unidos konfotme i publiku giya San Francisco an ma tungo' na duru i air force manlow, manengage gi low flying exercises giya, giya San Francisco City Lights, hu guarantee hao na u ma âgang i mayor, ya ilek-ñiha, "Can you tell the air force to stop it otherwise we'll call the president." Lao guini nai, hita ni chamoru todû, puru hit guihi na tiempo u guaiya, i guinaiya-ku, po'lo ha', po'lo ha' lâhi-hu sa' ti mamaigo' si Yu'os. Enao fihu ta sângan i ti manmamaigo', po'lo ha' sa' maolek i bidan-ñiha. Lao ti mafâtto gi hinasso-ta na guaha na guaha aksidente ya hâfa ya komu crash ayu F-15 talolo' guâtu gi siudâ annai manggaige taotao. Ti ta hasso ayu. Ni siña ma cho'gue i exercise-ñiha huyong gi tasi. Hâfa binabâ-ña ayu po ma cho'gue i exercise-ñiha ni low, low engage flights gi tasi pat hâfa na ti ma cho'gue Anderson housing. Hâfa na ma ayek i sengsong Chamoru gi sanhiyong i base na para u ma chocho'gue ayu siha i low engagements of flights or exercises? Iya Barigâda ma danche yan Tomhom sa' ayugue i yo-ña route. Pues, si Ânghet nai ti ha hongge ayu, hâfa na ti ma chocho'gue gi big navy pat hulo' gi Anderson housing? Tâya' na un ripâra i F-15 tumunok pâpa' gi Anderson housing. So guarantee hao nai i manasagua guihi ilek-ña siempre umâgang hulo' I mean i generat, I mean henerât, "Hey sir, it's really a nuisance for us." Lao ti nuisance para i Chamoru ni mañâsaga Mangilao yan Barigâda. Pues annai ha ripâra i che'lu-ta si Ânghet ayu, ilek-ña, "maila' fan ya ta balutan este na asunto ya ta nâ'i i Tiyan un chânsa para u ma na'pâra este." Gi un diha, ântes di bei in che'gue ayu para u galoppe i kellat, in na'i, in na'i bente kuâtto oras para u ma na'pâra i low flights Barigâda yan Mangilao yan Tomhom. Ti ha oppe' ham i militât i ma'gas. Pues esta lokkue' adai, guihi na tiempo esta manggung-ho ham, esta in tingo' hâfa para bei in che'gue. Guaha na ti mama'che'cho' i placards yan todû enao siha. Well let's take a step, a notch higher, pues in che'gue ayu. Ilek-ña, fuera di i nonviolent, let's step it up a notch ya ta gallope i kellat. Let's break hâfa dipotsi lai-ñiha yanggen trespass, trespass so be it. So, in chânsa ayu, pues magâhet guihi na ha'âni, un râtu ha' i che'lu-ta, ilek-ña, "maila' sa' man po fanggaige todû i media." Pues, lâmita i Nasion manestâba pues manhânao ham guihi guâtu, esta para talo'âni guihi, hu hasso ya pâ'go malatitira yu' ginen i che'cho' sa' muna' mama'estro no na ha'âni ya guihi na momentu, ilek-hu, ilek-ña si Ânghet, "maila' ya ta cho'gue pâ'go, maila' ya ta gallope." Pues, guihi na momentu magâhet, todû **in pula' (34:55)**, tâya' hinasson-mâmi, in che'gue hâfa para in che'gue ya in gellepe iya Tiyan. Pues,



www.HonggaMona.com

ayu na manmakatdume ham guātu ni dipotsi i security enteramente yan i GPD. Guihi na tiempo, i “sieze unit” yan gos na’chalek este sa’ i seize unit umbe mambula guihi sumuppote Nasion nai ya annai ma sapblâsos yu’ pâpa’ yan si Ânghet gi hilo’ pâddet I mean asphalt, guaha siha nai che’lu-ta ni humandcuff yu’ ilek-ña, “che’lu, dispensa’ ha’ lao i che’cho’-hu este hu chocho’gue” ya ilek-hu, “okay.” Mânu i chi-ña pues i suppote ginen i mañe’lu-ta gi GPD gaige gi kurâson lao ma chocho’gue i che’cho’-ñiha sa’ tinago’ ni militât. Guihi na tiempo nai an ma’aresta hao no ni militât, ma âgang GPD sa’ ma tungo’ na sabit este siha. Pues manma’âgang civilian ya manmafile i charges kontra i civilian justice, judicial system. Pues, magâhet todū manmafile charges ham guihi na tiempo. Lao kâda an manhâlom ham gi kotte lao and behold guaha unu na atungo’-mâmi ni manggosatungo’ ham gi na abugao. Dos na abugao ni manhami gi law school piot ayu unu ni humami gi grupun “Chamorro”, humami na dos nu umeskuela gi law school. Ya guiya magâhet, fihu sumâtba ham kâda manhâlom ham gi, gi kotte separât para u na, ha hekse i direchon-mâmi. Komo guaha direcho-ña este siudadânu para u famprotest sigon gi ayu mafa’nana’an “Constitution” no ilek-ña, “Constitutional right of protest.” Pues, magâhet ha usa ayu ya fihu manmadrop i case or manmadrop i charges para hami. Entre todū i tres biâhi di manmadâggao ham gi, manmakalabosu ham, tres biâhi di ha gâna si siñot abugao, attorney Mike Philips, i counsel-mâmi yan i che’lon-mâmi si Therese Terlaje, abugao guihi na tiempo yan si Mike Bordallo, pâ’go na tiempo judge, guiya matatâ’chong komu judge, justice. Ayu siha magâhet na mañe’lu-hu, manggosatungo’ yan guâhu yan si Ânghet ya maseha hâfa nu che’cho’ Ânghet, todū i tiempo, todū i tres, ma kalan Ânghet, para si Ânghet, siha komu guaha si Ânghet ha cho’gue ni ha necessita ayudu ginen i abugao siha. Pues, sin duda na guaha siha gi mañe’lu-ta guihi na field gi, gi law todū i tiempo, ha supoppote Nasion. Pues, ginen ayu dângkolo’ na saina ma’âse’ para siha lokkue’.

Guihi na ha’âni, guaha fa’na’an dies lao kuâtto

Miget: Pues, todū manggallope

Ed: Yeah, about dies manmanggallope lao fa’na’an kuâtto ham manma’aresta. Manmalâte’ este na militât piot sa’ gaige NSA no. Todū i tiempo gaige i NSA, i National Security Agency. Gaige fihu, ha park gui’ pa’go i karetâ-ña ni civilians no todū mantintint todū enao siha. Sahnge ha’ i military police, sahge i NSA. I NSA todū i tiempo, ha chehek todū este bases, kao maolek i tratâmento entre komunidâ yan i bases. Pues, guaha representâten i NSA, National Security Agency di kâda guaha asunto put militât gi maseha mânu achokka’ Germany, manu na manmastation i militât, komo ha tungo’ na guaha achâki entre komunidâ, i siudâ yan i komunidâ achokka’ Germany’s public, general public yan



www.HonggaMona.com

i todū i tiempo gaige NSA guihi para u na'siguru na guaha pās no. Pues, todū i tiempo, gaige i NSA guihi. Pues, i NSA manggaige guihi. Pues, fuera di ayu, manggaige lokkue' i military police para u kubre hāfa i necessidāt-ñiha para u ma na'pāra hāfa bidān-māmi no komu para trespass para bei in fanma'aresta gi taiguihi na manera. Ya sin duda na mās kuāttro manma'aligao guihi pues esta i NSA ha cho'gue i yon-ñiha che'cho' guma' no i homework-ñiha. Ilek-ñiha kuāttro guihi gumogo'te timon, si Ånghet, si Dave Sablan, si Rumbo yan si Ed Benavente. Ya ma talulu'i i lilok. Otro, todū i kuāttro ni manleaders no so to speak manma'espaha po fanmaresta. I pumalu manmasotta, ti ilelek-ña na ti ma tungo' hāfa ma chocho'gue i pumalu lao fihu ham na guāhu yan si Ånghet yan i pumalu ni manma'aresta nu guaha mās nu siña in sangan put hāfa siha na asunto no ni siña ma kubre ni entre hami na kuāttro. Pues, esta ma tungo' ha' ni federāt hāyi para u ma aresta. Munga ma aresta ayu na taotao, aresta ayu na taotao, aresta si Ånghet, in primet lugāt si Ånghet. Pues na'tinattiyi as Benavente. Pues na'tattiyi todū taiguini and taiguini. Pues, they know, they know hāyi para u ma sa' very selective i NSA. They know who, who is the mover and the shaker ya once we eliminate that factor of that group or that ayu mafa'nana'an "catalyst" so to speak. Komu un na'suha ayu i catalyst manmachalappon ha' todū lao mandagi ayu na filosofia. Ti mama'che'cho' sa' achokka' mānu si Ånghet, ha kontinunua gue' todudu i che'cho'-ñiha Nasion so dāngkolo' na linachi guihi i think tank-ñiha. Guaha iyo-ñiha think tank gi estados unidos na todū i tiempo para este na asunto. Lao kāda ilek-ña, "Ma move i pawn-ñiha," ilek-ña i Chamoru lokkue', "Move tres pei pāsa mo'na lokkue'." Ti manmafātto hit kao para ta checkmate pat āhe', lao esta in tingo' hāfa para u ma cho'gue. Pues, sin duda na esta in tingo' lokkue' kon tiempo hāfa i hinasson-ñiñiha sa' si Ånghet na taotao gos maolek guihi. Ma nā'i si Ånghet rigālu gi para manhasso yan manaitai taotao. Pues ayugue muna' ya-hu ayu na che'lu-ta i ya para hāfa di ta puni, we lost a great one. Ya ta'lo buente tiempo para u faloffan, para u fañodda' ta'lo otro na taotao ni mātto guini na eskalera ni ha gogo'te si Ånghet. Tāya' i yo-ña compatibility, sin duda, komu guiya mā'gas gi Nasion guihi na tiempo. Tāya' i yo-ña, you can't compare him with anyone, tāya'.

Gi entre todū siha i asunton ni in kubre, ya in mumuyi para u realiza i taotao-ta guini gi isla, giya Guam nai. Unu gi entre todū, mās impotānte ni ayu mafa'nana'an "Chamorro Land Trust Act." Guihi na tiempo, mafañāgu este na ākto tātte gi sitentai tres na sākkan. Ya i taotao ni plumanuyi este siha na ākto, esta mātai i dos, si Paul Bordallo yan si yan si, hāfa?

Miget: Oh, i ga'lāgu, gof a'gang i

Ed: Huchom ha', huchom ha', hālla hālla, maipe' sungon ha' ha, okay tātte ayu



www.HonggaMona.com

Miget: Oh, tutuhon

Ed: Oh tutuhon ta'lo

Miget: Or uh, yeah, pot fábot, yeah put i mas takhilo' na asunto

Ed: okay, esta.

Ed: entre todú gi mobimenton i Nasion ni in che'gue, guaha unos kuántos siha ni mantakhilo' ya unu gi in hasso na mas takhilo' na asunto ni ayu mafa'nana'an "Chamorro Land Trust Act." Unu este na ákto ni ma establisa tátte gi sitentai tres na sákan, mit nuebi sientos sitentai tres as Senator Lujan yan si Senator Bordallo guihi na tiempo. Dos este ni hoben guihi na tiempo gi sitentai tres, siña ta sárgan menhádom na senadot i dos ya ma tungo' put i kinalámten i mannatibu gi otro siha na nasion. Pues un diha, kombida ham si former senator Lujan guátu gi ofisiná-ña, guáhu yan si Ánghet. Ya manmatá'chong ham ya ha ná'i ham, ha laknos huyong i Chamorro Land Trust Act ya ha sangáni ham na estague na ákto para u dipotsi bentáha para i taotao-ta na yanggen mátto i idát-ña este i taotao-ta gi disiocho años, libri para u fanapliká táno' para u guálo' pat para u sága komu guma'-ña, fanhátsa gumá'-ña i taotao. Yan magáhet bula guihi na tiempo annai in tutuhon i Nasion, ti in tingo' na asunto ni manmapása ya ti manmaimplementa. Pues, annai in li'e' nai, matá'chong ham pápa' yan si Ánghet, ilek-hu, "maila' ya ta chule' tátte gi Nasion." Pues, ilek-ña si Ánghet, "Yeah, ya ta tachuyi." Pues, in ná'i dāngkolo' na si yu'os ma'áse' si difunto Senator Lujan guihi na tiempo. Ya in chile' i ákto, in presenta gi Nasion, I Nasion ma pása ya humuyong in tutuhon ayu mafa'nana'an "petition to, for the implementation of the Chamorro Land Trust Act." Pues in tutuhon, káda sengsong manhānao ham no. In liliku'i todudu i sengsong giya Guam ya manmatatá'chong ham. Guaha na hami ha' yan si Ánghet, guahu ha' yan si Ánghet gi kanton chálan, guaha na labula gi minision sa' ha'áni ayu na malitira yu'. Guaha na si Ánghet ha' na maisa i taotao gi pápa' nu ha dandan nu, I mean kampána ya nu guiya i taotao nu manrikokohi petition signature siha ni para u ma suppote i ma'implementá-ña i Chamorro Land Trust Act. Pues, magáhet an esta in rikohu más ki fa'na'an dies mit na signatures guihi na tiempo, i finetman i linahyan, esta ilek-ña si Ánghet, "Básta, esta nahong. Nihí ta chule' pápa' pá'go gi liheslatura." In chile' pápa' gi liheslatura pá'go manhádom ham gi liheslatura esta ma, guihi na tiempo esta kalan masiesiente i liheslatura na guaha kinalámten-ñiñiha i Nasion Chamoru ta'lo. Ya kalan grábe yanggen para u ma fána' i liheslatura no. Pues, magáhet, annai manmátcha ham pápa' gi liheslatura ya in prisenta este Chamorro Land Trust Act. Gi tinituhon, kalan ayu mafa'nana'an "defense mode" na manggaige i senadots guihi na tiempo no sa' si



www.HonggaMona.com

Ánghet na taotao nai nu ha tungo' nu dumanche i asunto yan taimanu para u approach este siha na taotaogues. Pues, magâhet, annai in hatme hâlom i liheslatura, mambula ham guihi na tiempo. In tampe ha' todududu kontodu i sanhiyong yan sanhalom. Pues, maninespânta i manmâ'gas-ta guihi na tiempo ya ilek-ñiha "Okay, maila' ya ta draft bill ya ta na'fitma i gobietno ya u chagi umimplementa este para i taotao-ta." Humuyong kalan mumahettok mapâsa gi liheslatura lao mumahettok gi gobietno no. Ya unu gi iyo-ña argument ayu para ti siña na para i Chamorro ha' po ma nâ'i. Necesario nai ayu pâ'go tuma'yok na taotao ni tâya' tâno'-ña ginen otro na nasion. Ta nâ'i lokkue'. Pues, umbe si Ánghet ilek-ña, "Nangga nâya, sa' anggen gumupu para i otro siha na nasion, ti un manâ'i tâno' umbe." Para ilek-ña, "Hâfa na i Chamoru ha' na taotao guini gi treinta miyas na ânakko' yan ocho put mâs âncho na miyas, para ta fanmanâ'i tâno' ta'lo para i otro râsan taotao?" Hâfa ya para hâfa i taotao-ta hâfa tetehnan para i taotao-ta anggen este i Chamorro Land Trust para todú? Pues magâhet nai, guaha sustansia-ña ayu, ilek-ña si Ánghet, "Yanggen humânao yu' ya humânao hulo' umbe gi mismo che'lu-ta siha, mañe'lu-ta giya Notte Marianas," ti siña gui' kualifika komo Chamoru sa' i homestead para i manChamoru yan i manRefaluwasch giya Notte Marianas. Âhe' ti para Chamoron Guam. Pues, ha chule' ayu si Ánghet nai sustansia ya magâhet nai na ti ha kontra i Notte Marianas, ya ilek-ña, "Ayugue na atgumento, ta usa Ed. Maila' ya ta usa ayu na atgumento mismo i mañe'lu-ta gi lâgu. Ma prohibi Chamoron Guam kuatstatria i Chamoru, iya hita guini, hâfa na gos libri hit para ta pátte huyong i tano' para todú ha' maseha hâyi." Annai humânao hao para Belau, parehu ha'. Ti un hânao guâtu guihi komu nuebu na residente ya ilek-mu, "Hey, presidenten Belau, manggâggao yu' tâno' gi tano'-miyu lai." Ti siña umbe no un cho'gue. Primet, fine'nana todú i tiempo in primet lugât, i gobietno guihi na nasion, siempre ha prutehi i taotao-ña siha. Muchomâs i mannatibu maseha mânu hao guâtu. Pues, magâhet in isa i atgumento, manhânao ham para i kotte, ha gâna si Mike Philips, si Therese, yan si Mike Bordallo i council-mâmi gi fine'nana na biâhi, lao ântes di in ganna gi kotte nai, mamprotest ham gi me'nan i mafa'nana'an "Governor's, Governor's Office" giya Anigua. Ya magâhet treinta dihas dinira ham para bei in chagi kumombense i maga'lâhi guihi na tiempo para u implementa. Ya para hâfa hit mohon nihi ta fanhânao para i kotte ya para ta baba i balutan guihi. Lao annai mumahettok nai guihi na tiempo i gobietno, ayugue na in kenne' para i kotte. Pues magâhet in ganna guihi. Pues, guihi na tiempo i gobietno, ha implementa i tinituhon i para i Land Trust ni para u ma tutuhon muespiha kuânto na tâno' ni siña ta rikohi guini ya ta na'hâlom guini na inetnon ni para u Chamoru nu u fanmanâ'i. Pues magâhet, ayugue tutuhon-ña lao, esta ha' para u huyong ayu na adminstrasion ya manhâlom nuebu. Pues, annai manhâlom i nuebu, esta lokkue' i che'lu-ta Ánghet, to'a para u falâgu para senadot. Pues, i mina'dos biâhi guâhu ma'ilili komu guâhu maga'lâhi para i



www.HonggaMona.com

Nasion guihi na tiempo. Ya si Anghet, guihi na momento, ma' ilih para guiya senadot guihi na tiempo giya Guam. Pues, dumanña' ham na dos. Guahu chumule' i timon para si Anghet gi Nasion, yan guiya nu komu senadot. Pues, otro na gobietno pa'go. Fuera di para un implementa i Chamorro Land Trust Act ya para un tutuhon muna'fanmata'chong i Board of Commission no. Dedi di u ma tutuhon lokkue' esta i aplikasion. Ya i otro na gobietno ni humalom, ti malago'. Pues, ta'lo, pa'go na biahi, guahu komo guahu guihi maga'lahi ni Nasion Chamoru. Ta'lo manmacha ham papa' yan makampout ham. Ahe' ti treinta dihas. Tres meses sagan-mami giya Hagatña pa'go na biahi. Ya bula magahet sakrifisio guihi na tiempo. Ya hu tungo' ha' i siniente-ña i che'lu-ta as Anghet guihi na tiempo sa' matata'chong gui' komu senadot ya ha kekeassiste ham no gi taiguihi na chalan ya guahu gaige yu' gi Nasion ya guahu guihi muma'gagasi i mobimenton i Nasion. Pues, gi dos manasodda' ham ya chumilong halom, in afuetsas i gobietno para u tutuhon pumatte' i tano'. Pues, humuyong magahet, in ganna ta'lo gi taiguihi na manera pues desde ayu para mo'na, nu magahet maseha bula sakrifisio, ma implementa i Chamorro Land Trust. Pa'go na gi prisente, kada diha, guaha manma'empatte tano para i famagu'on-ta ni parehu ha' an humanao hao para maseha manu na Indian Reservation giya estados unidos, strictly and exclusively para i American Indian Natives. Pues, parehu ha' esta na programma, parehu ha' yan i Hawaiian Homestead Act lokkue'

K, Si Yu'os Ma'ase' nu enao put taimanu na in tutuhon este grupon "Chamorro" ni mandanderu. Ayu buente na un tungo' pa'go komu hu baba este na balutan nai, "Hafa taimanu si abugao Mike Philips yan ayu siha, manhami yan mandidok i hinenggen-ñiha, lokkue' gi filosofian Nasion Chamoru. Humami yan si Miget tatte gi law school gi annai umeskuekuela ham gi University of West, ahe', umeskuekuela yu' gi University of West L.A., si Mike UCLA ni umeskuekuela ya parehu ham na dos umeskuela law school nai. Pues, humalom ham na dos ya kada finakpo' simana ilek-ña pa'go si Attorney Mike Philips, "Ed fatto fan papa' Santa Monica ya ta kuentos na dos." Pues, fihu ha' kumuentos ham. So, umali'e' ham yan si Mike antes di bai in hanao para lawschool gi ochentai dos na sakkan annai si tihu-ña, si Ricky Bordallo, si Governor Ricky Bordallo, guiya governor ya ha ripara yu' si Mike, 82, annai kumuentos yu' gi Commonwealth conference gi unibetsidat. Desde ayu, si Mike, malago' para bai in atungo' lokkue' nai. Pues, magahet umatungo' ham desde ayu pues annai humanao ham na dos para law school, humami ha' ta'lo gumang ham na dos. Pues, kada finakpo' simana magahet, mata'chong ham papa' ya ilek-ña, "Hafa siña ta cho'gue gi taiguini na manera?" I maneran, taimanu para ta satba i lengguahi-ta yan i kottura-ta yan tod, ilek-ña. Ilek-hu, "Maila' ya ta cho'gue hafa minaolek-ta nai na dos desde antes no danderu hit na dos. Maila' ya ta fangge'." Pues, magahet nai, desde law school na dos, mangge' ham yan si Miget. Esta makmata ham na dos no guini gi



www.HonggaMona.com

asunton todū i Chamoru ni taimanu para u l 'la'. Pues, mayuriha, ai si a hu s ngan sientu put sientu gi tinige'-m mi gi grupon "Chamorro" na pl ka. Puru ha' put asunton Chamoru komu ti ayu mafa'nana'an "drugs." Drug problems ni ta faf ana' ni ayu  mot na k nta yan i "Federales", i tratamiento kontra i taotao-ta ni machule'guan i tano', i ma pruhibi i lenggu hi guihi na tiempo, gu hu tumuge' i "Federales" osino ha s ngan si Miget "tumuge'  mot." Si a un s ngan na, fihu ilek- a "Kalan si John Lennon and Paul McCartney hit ni Lennon and McCartney." Ilek-hu, " he' Miget, Chamoru hit na dos pues b sta ya ta po'lo nu Philips and Benavente,  he' ti Lennon and McCartney."

Lao mag het humitde si che'lu-ta ya desde ayu mag het, esta in pakeketi i tinige'-m mi, konfotme ham m tto ham t tte ginen law school. Gu hu ti munh yan yu' lao guiya ha na'funh yan. Pues, annai m tto t tte, mat 'chong ham ta'lo ya p 'go na bi hi ilek- a, "Maila' ya ta public, I mean ta fam 'tinas plak -ta." Pues, mag het guihi ha' na s kkan annai m tto t tte si Mike, esta in tutuhon nu tumuge' in po'lo na ta fandan a' todū i instrumentu pues gai gi nobenta fa'na'an disembre na i fine'nana na CD pl ka in na'huyong i history, first time, first CD giya Guam. T ya' trabiha CD guihi na tiempo lao hami fine'nana muna'huyong. Yan ayugue malago'- a si Miget i fuera di ta s ngan todū put asunton Chamoru, maila' ya ta na'fine'nana of everything no. Pues, ilek- a, "maila' ya ta na'pl kan CD este kini ayu wax sa' guihi na tiempo guaguaha ayu wax album no ayu plak n album, I mean wax. Pues, maolek a, maolek a ta cho'gue i CDs yan cassettes, pues in che'gue nai gi CDs and cassettes pues mafa agu mag het guihi. Guiya ayu mafa'nana'an "one hit wonder" uttimo ha' guihi annai munh yan ham sa' hum nao ham yan si Miget gi diferentes lina'la'-m mi. Guiya hum lom gi judicial system, gu hu hu konsigi ha' mo'na mumaestro yan in tattittiyi ha' Nasion. Si Mike todū i tiempo, gagaige ha' gi fi'on-m mi komu h fa ach ken-m mi gi todū asunto ni in fafana'. Yeah, ayugue tutuhon- a ya hunggan hami na dos tumuge' todū i kanta. Guaha na manemp tte pumalu membro guihi si h yi p 'go guihi members si Mayor John Blas, i che'lu-ta maolek na kakanta, si Chief of Police p 'go si Fred Bordallo iyon-m mi keyboard yan si Suba, si Captain Suba asagu - a si Jolene iyon-m mi female singer pues mag het in fotma i grupon "Chamorro" ya desde ayu, guaha siha na manhobensitu yan- iha, guaha na man mko' ilek- iha na "mandisatentu hamyo" lao guihi in tinige' este atista m ngge' hao nai, un tutuge' h fa i siniente-mu. Pues, ti si a na bei ach kka si put i hemplo, si John Lennon, i tinige'- a nai "Imagine" ya ti ya-mu i palabr s- a, so what? I tinige' atista ya maila' ya ta agradesi tinige'- a. Ti todū taotao siempre gumuaiya, guaha ayu na taotao gumuaiya, guaha ayu taotao ni ti gumuaiya i tinige'-mu, lao hu siente na guaha gumuaiya i tinige'-m mi ya ma agradesi sa' necessita guihi na tiempo. Didide' ha' na mobimento.



www.HonggaMona.com

Makkat para bei sangan háfa para in primet lugát para bei sangan, áhe', para bei ayek entre i tres. Ya-hu sumángan fine'nana na magáhet i Nasion Chamoru, in introdusi este lehislasion tátte gi annai estába si Ánghet yan si Senator Hope Cristobal gi senadot ya annai in siente na mana'háлом as Senator Hope Cristobal este i bill, i, at that time, bill 27-147, i Commission on Decolonization, maninteresao i Nasion sa' pá'go na kalan guaha chálan ni para bai in chile' ni para u, u guaha resolusion entre i dinanña'-ta yan i estados unidos yan i hagas obligásion-ñiha sigon gi tritás ni mafitma tátte gi kuarentai sais na sákkán annai ma na'háлом Guam gi ayu mafa'nana'an "Non Self-Governing, Self-Governing Territories" na lista. Pues desde ayu magáhet, i, desde ayu esta hulo' annai i ha chule' i timon i O.P.I.R. para u kontinua i che'cho', hulo' esta i hami na henerasion annai in **praktiki (58:06)** gi Nasionen Unidos este siha na asunto. Pues, sin duda na magáhet ti ehihihi' ayu na cho'cho'. Lao en fin, ma pása, manestába ham guihi Nasion ni para in supote i mapasá-ña, i ákto. Ya humuyong pá'go, ayugue nu muná'i'i fuetsa i ahensian gobietno para u tutuhon i edukasion entre tres na estao pulitikát era i independensia, dos, free association, yan tres, ayu affiliation or mafa'nana'an "statehood" kontra i nasion ni kumoloninisa hao. Pues, tres na dipotsi gaige gi trites-ñiha i estados unidos. Now, ya-hu sumángan guini pá'gogo ha' na este na kontráta ni tres estao pulitikát, ti inayek-mámi yan si Ánghet or inayek-ña si Hope Cristobal annai ma pása i ákto. Na guiya este inespehos i dipotsi obligásion-ñiha estados unidos annai ma fitma i trites-ñiha yan i más ki singkuenta na nasion gi enteru mundo. Pues, gi taiguihi na manera, táya' in chechennek na dipotsi i obligásion-ña estados unidos taiguihi bidá-ña gi mañe'lu-ta giya Micronesia era i Republic of the Marshalls, era i FSM, era i Republic of Palau. Todu este siha mampoddong gi ayu i parehu ha' na U.N. na dokumento gi Nasionen Unidos lao by unu ha' na numero muna'diferensia hit (we are different from one number). Nu, ya guaha ma po'lo gi ayu Non Self-Governing na listing ya guihi na lista ni manggaige i Chamoru manggaige lakkue' todudu i states ni pá'go manindependensia giya Africa, i manggaige giya Indonesia, todudu. Bulaña lista ni manggaige i Nasionen ni manindependensia pá'go manggaige gi under i "non self-governing territories" as opposed to annai manestába i Palau, Marshalls and todu enao siha. Pues, gi taiguihi na manera, ayu na táya' tetehnan giya estados unidos, I mean gi Nasionen Unidos, na nasion ni ti ma hehekse i direchon-ñiha, para u ma release, mánu na estao malago'-ñiha na kinse ha' tetehnan. Esta i East Timor uttimo. Ya gi pápa' i banderán estados unidos, i Virgin Islands, American Samoa yan Guam. Pues, gi taiguihi na manera, ya-hu nu sumángan pá'go na pátte gi ayu kontrátan-ñiha yan i Nasionen Unidos i para u na'siguru estados unidos na i taotao ni para u hekse i direchon-ñiha gi estao pulitikát, debi di u ma iduka ántes di u háлом i botasion. Kumekeilekña este siñot na ántes di bei ayek kao para independensia



www.HonggaMona.com

malago'-hu na estao pat free association pat affiliation pat statehood, gi entre i tres, debi di hu tungo' hâfa i sustansia-ña kâda unu. Gi prisentete, manmafâtto hit guihi na momentu or guihi na eskalera sa' tâya' nu ti macho'cho' i obligâsion-ñiha Estados Unidos taiguhi bidan-ñiha giya Marshalls, Palau, FSM yan i Notte Marianas ni manmanâ'i salâpe' para edukasion. Giya Guam, put ha' gaige hit i otro na authoridât gi Nasionen Unidos, ma ayu mafa'nana'an "Manmafatatâni hit." Manmadisatetende, ilek-ña, "po'lo, po'lo sa' kakaiha" Kakaiha' ayu siha, ti toto'a trabiha, ti toto'a. Lao i kuestion guini ngai'an na para ta fanto'a? Enague ya yanggen ilelek-ta na mambanidosu hit komo manChamoru hit guini giya Guam na meggaiña mediku guini giya Guam kini mediku giya put i hemplo FSM. Hâfa na FSM esta manggaige gi eskalera ni ma ayek i estao pulitikât-ñiha pat Palau. Ai nanalao, anggen ilek-ta, "ee meggaiña na manggaige na Chamoru-ta gi dentista, mamprofesât yan todû enao siha na mamprofesionât na pusision." Lao, ti siña un sângan kao guaha direcho-mu gi estao pulitikât di para un ayek? Tâya' pusision-mu. Guâhu manhongge yu' nu este na ântes di bei oppe' ayu na kuestion, mânu dipotsi estao pulitikât ni para bei ayek petsonatmente, ilek-hu na guâhu hu tattittiyi i konsensian i linahyan. Yanggen despues di edukasion esta makomprende hâfa na estao malago'-ñiha, bei tattiyi lao guâhu bei ayek hâfa na estao ya-hu lao bei tattiyi i mayuriha ni ma'ayek ya an na'chu'ot na ma ayek mâs unu ki otro, hâfa yu' bei cho'gue sa' mayuriha. Hita ni Chamoru, Chamoru, manmanhongge gi ayu perfekto, perfekto demokrasia. Ya yanggen tai hehekse ya ta ayek put ihemplo Free Association, ayugue i inayek-ñiha i mayuriha. Ya yanggen ayugue ma ayek, pues hâfa hit ta cho'gue? Free Association ta tattiyi. Pues, guâhu hu tattiyi ayu, guaha iyo-ku personât gi hâfa malago'-hu lao kao enao malago'-ña i ume'ekungok gi, gi telebikbik i opinion-hu, hâfa para bei ayek sa' anggen guâhu un fafaisen hit, guâhu bei sangâni hao sa' ti mamâhlao yu', bei sângan ha' na independensia ya-hu. Ayu gos ya-hu independensia sa' hu ripâra na ma gupuputi independensia gi todû nasion. In primet lugât, estados unidos, kâda July 4th, hâfa ma silelebra. Todû i tiempo sinseru yan fiet i hinenggen-ñiha na independensia. Gos mannge' ayu independensia para estados unidos kontra i hagas tatân-ñiha or nanân-ñiha inglaterra gi mit siete sientos sitentai sais na sâkkan annai ma diklâra independensia, ilek-ñiha i estados unidos na residânte ilek-ña maila' ya ta kontra si nanâ-ta ya ta sotta hit ya ta fanlibre. Pues i kuestion-hu guihi nai, yanggen mannge' ayu independensia para siha? Hâfa na bâba para hita? Hâfa na yanggen mannge' kâtne-mu anggen un taña', hafa na kalan mala'et yanggen guâhu para bei taña' or ti kombiene na mannge' para hâgu Ed, pues guâhu nai hu hasso gi taiguihi, bei tattiti i mayuriha lao anggen ha fafaisen yu' i taotao personatmente hâfa i siniente-ku, tâya' mâs ki dipotsi hâfa nu tinago', âhe' ti taotao ha' na kontudu i Yu'os sa' fihu ma sângan i biblia na ha bira gui' tâtte si Kristo. Ilek-ñiñiha na siempre ha sodda' i Kings of Kings guini gi tano'-ta ni mamommokat. Pues, yanggen para u fâna' mâgi todudu i Kings of Kings gi



www.HonggaMona.com

kâda nasion, i saina-ta, Yu'os-ta, pues debi di ta na'listo hit para ayu na ginaggao. Tâya' mâs in primet lugât ki hinengge-ta komu i relihion-ta komo mankatoliku pat protestante yan todû enao siha. Ya komu fiet i hinengge-mu gi esprituat na manera yan todû enao siha, pues tattiyi konsensiâ-mu gi hâfa inayek-mu komu estao pulitikât ni maolek para i taotao-ta. Ahe' ti ilelek-hu, tattiyi yu' sa' ayugue malago'-hu, tattiyi hâfa hinengge-mu gi kurâson-mu yan i anti-mu.

Este i para u ma usa Pâgan komo mafa'nana'an "military exercises" para espesiatmente para bombing exercises, piniti yu'. Piniti yu' sa' ya gos makkat para personatmente sa' ti taotao Notte Marianas yu'. Ya tâya' siña manâ'i authoridât para u ma destrosa i dipotsi entre i disiseis, i kinse na isla ni gumogo'te, ni pâpa' i banderan Notte Marianas yan siha mismo. Ya ti siña Chamorron Guam umentalo' guihi pues puti yu' gi taiguihi na manera sa' manmañe'lu hit gi haga', manmañe'lu hit gi lengguâhi, lao makkat para bei entalo', bei entalo' gi dipotsi gi achâken-ñiha no. Komu taotao Notte Marianas yu' ya mafañâgu yu' guihi, fiet hinengge-ku na bei kontra sa' rigâlu umbe este disiseis na isla ni mafa'nana'an "Chamorro Archipelago" no siña ta sângan or "Marianas" Islas Marianas. Ti Guam sahnge, todû i tiempo manggaige hit kadena. Hagas tiempo tâtte mit put mit âños manggaige mangguello-ta guini, tâya' na manmasipâra hit gi estao pulitikât-ta. Ti enao dumibidi i Chamoru-ta, i estao pulitikât ni mangkoloninisa, ayugue dumibidi i Chamorro entre Notte Marianas yan i islan Guam. Piniti yu' kâda hu hungok na manhâhânao desde Anderson ya manhânao hulo' ya ma bomba. Lao maila' ya bei sângan este, hagas macho'cho' gui' no desde i 19, i mit nuebe sientos sisenta na sâkkan desde Vietnam bombing era. Esta ma praktitika ma destrosa No'os ayu Farallon de Medinilla, No'os i orinât na'ân-ña ayu gi antigoyan. Pues, hagas ayu dipotsi na sagrâdu na isla muna' hu sângan na sâgradu na isla sa' guiya este na isla dipotsi entalo' un isla asta i otro. Pues, ma u'usa, hu sospecha ni manantigu i mangguello-ta annai duru i tiempon Proa. Para u fandeskânsa didide' guihi. Pues, ayu na ma chule' i tali para u ma hâtme, mangahulo' gi proan-ñiha, ya ma paki hulo' ta'lo gi otro na isla. Pues, kâda isla guaha intension-ña. Ya yanggen un ripâra ayu na isla ântes di u ma tutuhon madestrosa ni military bombing, un ripâra na bula guihi siha gâ'ga', pâluma, chonchon pâluma siha, yan todû klâsen gâ'ga' era ta sâsângan i haggan yan todû ayu mañasâga na gâ'ga' yan guihan gi para i tasi gi rubentason or i papângpâng nâpu siha. Pues, kâda hu atan, pat hu egga' i news, na adahi hamyo ni manggugupu hulo' Notte Marianas sa' para u duru ta'lo i bombing. Pininiti yu' nai nu ayu. Lao un tungo' hâfa, mâs dangkolo' na piniti-ña mâs, na ayu ti siña yu' komu Chamorron Guam achokka' fiet hinengge-ku na bâsta ayu madestrosa i islâ-ta, sa' i anten i guello-ta manggaige guihi. Sagrâdu ayu makkat ayu pâ'go para bei kombinse i manmâ'gas giya Notte Marianas sa' siempre ma bira siha tâtte ya ilek-ñiha, "hâyi hao? Tâya' bisnes-mu



www.HonggaMona.com

guini komu Chamoron Guam hao.” Ya magâhet enao na kuentos ya ti hu achâka i che’lu-ta komu ha chatli’e’ yu’ nu ayu, lao hu gagaggao i mañe’lu-ta giya Notte Marianas na put fâbot analisa este ta’lo dinuebu, analisa ya u ma ripâra este na achâki kao magâhet na maolek este i che’cho’-ñiha para u sigi ha’ ma bomba diâriu iya No’os or Farallon de Medinilla asta ki tâya’ siña lâ’la’ guihi. Put hâfa? Put salâpe’? Ga’o-ku ha’ ma na’fâkpo’ guihi siñot. Ayu na, kâda ma sângan enao na asunto giya guâhu pininiti yu’ sa’ guaha hu atan tâtte, tâtte, mit âños tiempo annai manggaige i guello-ta sa’ komu manggaige ayu ni mañasâga guini na mangguello-ta ya manhâlom gi ayu na mafa’nana’an “time tunnel” ya ma atan pâ’go i che’cho’-ta ni manChamoru pâ’go gi presente, ilek-hu na ti manmagof, guaha buente tutuho’ lago-ña, ilek-ña, “Hâfa enao na disision en na’i i militât?” Hâfa na guaha mâs ki singkuenta mit ai singkuenta chemical and dump waste sites guini giya sanhaya na pätte giya Guam ya bente singko na toxic and chemical waste sites ni manmadisclose ni navy tâtte gi nobenta na sâkkan ya esta pâ’go ti ma na’gagasgas guini mismo giya Guam? Hâfa na ti ma na’gagasgas ayu? Duru hit ta kombida hâlom lao ti ma na’gagasgas i hagas applacha’-ñiha ni para u na’binenu i hanom ni unu ha’ i yo-ta aquifer, unu ha’ i yo-ta aquifer di manggimmen hit hânom. Hâfa tetehnan nai? Para ta sângan “No.” When do we stop and say no, enough is enough? Put i guinaiya-ta put i amerikânu, umbe siña un guaiya i amerikânu gi maseha hâfa na manera lao ti necessario un sakrifisia i manmamaila’ na henerasion na famagu’on yan neni ni ti manmafañâñagu put para un na’magof otro na nasion. Ti hu komprende enao. Why not conduct the bombing and exercise in other words at Martha’s Vineyard giya sstados unidos. Why Guam? Treinta miyas ha’ na anakko’-ta. Martha’s Vineyard gi hilo’ estados unidos dângkolo’ña ki islan Guam. Hâfa na ti siña guihi? Hâfa i mañe’lu-ta giya Marshalls na ma sedi na para ayu na para u ma test ha’ todû i nuclear bombs. Ya âhe’ gi mas dângkolo’ na tâno’ estados unidos sa’ ma tungo’ mânu guâtu. Ayu na manhongge’ yu’ gi ayu mafa’nana’an “environmental racism” meaning maila’ ya bei chule’ i applacha’-hu ya bei pätte ayu siha i mannatibu ni ti mannecessita. Ayu na pininiti yu’ annai manma’usa i mañe’lu-ta giya Marshalls. Este na problema yan manma’usa iya Bikini para u ma test ayu i todudu i nuclear bombs yan i hydrogen bombs. Pues, hita pâ’go ni downwinders ni mambula chetnot-ta pâ’go ginen todû este siha na âtmas ni manmapâkpâk guini giya Micronesia. Hita pâ’go para ta ekspererensia todû este na minalângu, kansit, thyroid cancer, todû klâsi, diabetes, yan todû enao siha. Todû este ni kinahulo’ minalângu, Sus Maria Jose, hâfa para ta sangâni i famagu’on-ta ni ti manmafañâñagu? Na para u gâsgâs i tano’-ta oh, askepta boi sa’ you know enague minalago’-ña si Yu’os. Ilek-hu na “ti enao malago’-ña si Yu’os.” Enague siniente-ku gi minagâhet gi fiet. hinegge-ku.